

戎政典第一百六十四卷

兵略部彙考六十二

宋四

眞宗咸平二年七月契丹南侵十二月帝幸澶州親征之按宋史眞宗本紀咸平二年七月甲申

以傅潛爲鎮定高陽關行營都部署張昭允爲鈐轄九月癸卯鎮定都部署言敗契丹兵于廉良路

殺獲甚衆十一月戊午以魏咸信爲貝冀行營都部署十二月甲寅駕發京師次陳橋戊午駐蹕澶

州冀州言敗契丹兵于城南殺千餘人奪馬百餘匹辛酉宴從臣于行宮以王超等督先鋒仍示以

陣圖俾識部分壬戌賜近臣甲冑弓劍幸浮橋登臨河亭賜澶州父老錦袍茶帛甲子次大名躬御

鎧甲于中軍契丹攻威鹵軍本軍擊敗之殺其酋帥府州言官軍入契丹五合州拔黃太尉砮殲其

衆焚其車帳獲馬牛萬計丁卯召見大名府父老勞賜之三年春正月己卯朔駐蹕大名詔并代都

部署高瓊等分屯冀州邢州癸未以葛霸爲貝冀高陽關前軍行營都部署契丹犯河間高陽關都

部署康保裔死之乙酉流忠武軍節度使傅潛于房州都鈐轄張昭允于通州並削奪官爵丁亥幸

紫極宮還登子城閣騎射高陽關貝冀路都部署范廷召等追契丹至莫州斬首萬餘級甲午發大名府庚子至自大名府十二月甲子契丹稅木監使黃顥等率屬內附賜冠帶丁卯詔河東北緣邊吏民斬邊寇首一級支錢五千禽者倍之獲馬者給帛二十四 按傳潛傳咸平二年出爲鎮定高陽關三路行營都部署契丹大入緣邊城堡悉飛書告急潛麾下步騎凡八萬餘自置鐵槌鐵槌爭欲奮擊潛畏懦無方略閉門自守將校請戰者則醜言罵之無何契丹破狼山砦悉銳攻威鹵略寧邊軍及祁趙游騎出邢洛鎮定路不通者踰月朝廷屢問遣使督其出師會諸路兵合擊范廷召桑贊秦翰亦屢促之皆不聽廷召等怒因詣潛曰公怵怯乃不如一嫗爾潛不能答都鈐轄張昭允又屢勸潛潛笑曰賊勢如此吾與之角適挫吾銳氣耳然不得已分騎八千步二千付廷召等於高陽關逆擊之仍許出兵爲援洎廷召等與契丹血戰而潛不至康保裔遂戰死及車駕將親征又命石保吉上官正自大名領前軍赴鎮定與潛會潛卒逗遛不發致敵騎犯德棣渡河湊淄齊劫人民焚廬舍上駐大名而邊捷未至且諸將屢請益兵潛不之與有戰勝者潛又抑而不聞上由是大怒乃遣高瓊單騎卽軍中代之令潛詣行在 按錢若水傳若水從幸大名陳禦敵安邊之策有曰孫

武著書以伐謀爲主漢高將將以用法爲先伐謀者以將帥能料敵制勝也用法者以朝廷能賞罰不私也今傳潛領雄師數萬閉門不出坐視邊寇俘掠生民上孤委注之恩下挫銳師之氣蓋潛輩不能制勝朝廷未能用法使然也軍法臨陣不用命者斬今若斬潛以徇然後擢如楊延朗楊嗣者五七人增其爵秩分授兵柄使將萬人間以強弩分路討除孰敢不用命哉敵人聞我將帥不用命退則有死豈獨思遁抑亦來歲不敢犯邊矣如此則可以坐清邊塞然後鑾輅還京天威攝於四海矣臣嘗讀前史周世宗卽位之始劉崇結敵入寇敵遣其將楊衰領騎兵數萬隨崇至高平當時懦將樊愛能何徽等臨敵不戰世宗大陳宴會斬愛能等拔偏將十餘人分兵擊太原劉崇聞之股慄不敢出卽日遁去自是兵威大振其後收淮南下秦鳳平關南特席捲爾以陛下之神武豈讓世宗乎此今日禦敵之奇策也若將來安邊之術請以近事言之太祖朝制置最得其宜止以郭進在邢州李漢超在關南何繼筠在鎮定賀惟忠在易州李謙溥在隰州姚內斌在慶州董遵誨在通遠軍王彥昇在原州但授緣邊巡檢之名不加行營部署之號率皆十餘年不易其任立邊功者厚加賞賚其位皆不至觀察使蓋位不高則朝廷易制任不易則邊事盡知然後授以聖謀來則掩殺去則

勿追所以十七年中北邊西蕃不敢犯塞以至屢使乞和此皆陛下之所知也苟能遵太祖故事慎擇名臣分理邊郡罷部署之號使不相統轄置巡檢之名俾遞相救應如此則出必擊寇入則守城不數年間可致邊烽罷警矣俄知開封府時北邊未寧內出手札訪若水以策若水陳備邊之要有五一曰擇郡守二曰募鄉兵三曰積芻粟四曰革將帥五曰明賞罰何謂擇郡守今之所患患在戰守不同心望陛下選沉厚有謀諳邊事者任爲邊郡刺史令兼緣邊巡檢許召勇敢之士爲隨身部曲廩贍不充則官爲支給然後嚴亭障明斥候每得事宜密相報示寇來則互爲救應齊出討除寇去則不令遠追各務安靜苟無大過勿爲替移儻立微功就加爵賞如此則戰守必能同心敵人不敢近塞矣何謂募鄉兵今之所患患在不知敵情望詔逐州沿邊民爲招收軍給與糧賜蠲其賦租彼兩地之中各有親族使其懷惠來布腹心彼若舉兵此必預知苟能預知則百戰百勝矣何謂積芻粟今之所患患在困民力望陛下令緣邊各廣營田以州郡長官兼其使額每歲秋夏較其課程立鼓旗以齊之行賞罰以勸之仍縱商人入粟緣邊儻鎮戍有三年之備則敵人不敢動矣何謂革將帥今之所患患在重兵居外輕兵居內去歲傳潛以八萬騎屯中山魏博之間鎮兵全少非鑾輅

親征則城邑危矣望陛下慎選將臣任河北近鎮仍依舊事節制邊兵未能削部署之名望且減行營之號有警則暫巡邊徼無事則却復舊藩豈惟不敗戎心況復待勞以逸如此則不失備邊之要又無舉兵之名且使重兵不屯一處進退動靜無施不可矣何謂明賞罰今之所患患在戎卒驕惰臣自知府以來見侍衛殿前兩司送到邊上亡命軍卒人數甚多臣試訊之皆以思親爲言此蓋令之不嚴也平時尙敢如此況臨大敵乎望陛下以此言示將帥俾申嚴號令以警其下古人云賞不勸謂之止善罰不懲謂之縱惡又曰法不可移令不可違臣嘗聞郭進出鎮西山太祖每遣戍卒必諭之曰汝等謹奉法我猶赦汝郭進殺汝矣其假借如此故郭進所至未嘗少衄陛下能鑒前日之事卽今日之元龜也若水又言邊部用兵唯視太白與月爲進退者誠以太白者將軍也星辰者廷尉也合則有戰不合則無戰合于東則主勝合于西則客勝陛下能用臣言以謹邊備則邊部不召而自來矣太祖臨御十七年間未嘗生事疆場而敵人往往遣使乞和者以其任用得人而備禦有方也陛下苟思兵者凶器戰者危事而不倒持太阿授人以柄則守在四裔而常獲靜勝此備禦之上策也未幾出知天雄軍兼兵馬部署 按何承矩傳咸平二年契丹南侵屢遣內侍以密詔問禦

過之計密封以獻嘗詔聽邊民越拒馬河塞北市承矩上言曰緣邊戰擢司自淘河至泥姑海口屈曲九百餘里此天險也太宗置寨一十六鋪百二十五廷臣十一人戍卒三千餘部舟百艘往來巡警以屏姦詐則緩急之備大爲要害今聽公私貿易則人馬交度深非便宜且若鋪皆爲虛設矣疏奏卽停前詔屢被手札褒飭三年召還拜引進使州民百餘詣闕貢馬乞借留承矩詔書嘉獎復遣之承矩上言曰契丹輕而不整貪而無親勝不相讓敗不相救以馳騁爲容儀以弋獵爲耕釣櫛風沐雨不以爲勞露宿草行不以爲苦復恃騎戰之利故頻年犯塞臣聞兵有三陣日月風雲天陣也山陸水泉地陣也兵車士卒人陣也今用地陣而設險以水泉而作固建設陂塘綿互滄海縱有敵騎安能折衝昨者契丹犯邊高陽一路東負海西抵順安士庶安居卽屯田之利也今順安西至西山地雖數軍路纔百里縱有丘陵岡阜亦多川瀆泉源因而廣之制爲塘堦自可息邊患矣今緣邊守將多非其才不悅詩書不習禮樂不可守疆界制御無方動誤國家臣按兵法凡用兵之道校之以計而索其情謂將孰有能天地孰得法令孰行兵衆孰強士卒孰練賞罰孰明此料敵制勝之道也知此而用戰者必勝否則必敗夫惟無慮而易敵者必擒于人也伏望慎擇疆吏出牧邊民厚之

以奉祿使悅其心借之以威權使嚴其令然後深溝高壘秣馬厲兵爲戰守之備修仁立德布政行惠廣安輯之道訓士卒闢田疇勸農耕畜芻粟以備凶年完長戟修勁弩謹烽燧繕保戍以防外患來則禦之去則備之如此則邊城安堵矣臣又聞古之明王安集吏民順俗而教簡募良材以備不虞齊桓晉文皆募兵以服鄰敵故強國之君必料其民有膽勇者聚爲一卒樂進戰効力以顯忠勇者聚爲一卒能踰高赴遠輕足善鬪者聚爲一卒此三者兵之練銳內出可以決圍外出可以屠城況小大異形強弱異勢險易異備卑身以事強小國之形也以邊裔伐邊裔中國之形也故陳湯統西域而郅支滅常惠用烏孫而邊部寧且聚膽勇樂戰輕足之徒古稱良策請試行之且邊鄙之人多負壯勇識外邦之情僞知山川之形勝望于邊郡置營召募不須品度人才止求少壯有武藝者萬人俟契丹有警令智勇將統而用之必顯成功乃中國之長算也又如榷場之設蓋先朝從權立制以惠契丹縱其渝信犯盟亦不之廢似全大體今緣邊榷場因其犯塞尋卽停罷去歲以臣上言于雄州置場賣茶雖貨並行而邊氓未有所濟迄延訪大臣議其可否或文武中有抗執獨議是必別有良謀請委之邊任使施方略責以成功苟空陳浮議上惑聖聰祇如靈州足爲證驗況茲契

丹又非夏州之比也 按楊延昭傳咸平二年冬契丹擾邊延昭時在遂城城小無備契丹攻之甚急長圍數日契丹每督戰衆心危懼延昭悉集城中丁壯登陴賦器甲護守會大寒汲水灌城上巨悉爲冰堅滑不可上契丹遂潰去獲其鎧仗甚衆以功拜莫州刺史時眞宗駐大名傅潛握重兵頓中山延昭與楊嗣石普屢請益兵以戰潛不許及潛抵罪招延昭赴行在屢得對訪以邊要帝甚悅指示諸王曰延昭父業爲前朝名將延昭治兵護塞有父風深可嘉也厚贈遣還冬契丹南侵延昭伏銳兵于羊山西自北掩擊且戰且退及山西伏發契丹衆大敗獲其將函首以獻進本州團練使 按張凝傳咸平初契丹南侵凝率所部兵設伏于瀛州西出其不意腹背奮擊挺身陷敵凝子昭達年十六從行卽單騎疾呼突入陣中掖凝出左右披靡不敢動明年契丹兵大至車駕幸大名凝與范延召于莫州東分據要害斷其歸路契丹宵遁凝縱兵擊之盡奪所掠生口資畜徙鎮定高陽關路前陣鈴轄遷趙州刺史 按石普傳普徙爲莫州總管初契丹南侵敗我兵于望都旣而謀者言復欲大入寇帝自畫軍事以手詔示輔臣曰鎮定高陽三路兵宜會定州夾唐河爲大陣立柵以守量寇遠近出軍俟敵疲則先鋒出致師用騎卒居中環以步卒接短兵而已無遠離隊伍又分

兵出三路以六千騎屯威鹵軍魏能白守素張銳領之五千騎屯保州楊延昭張禧李懷岳領之五千騎屯北平塞田敏楊凝石延福領之以當賊鋒始至勿輕鬪待其氣衰背城以戰若南越保州與大軍遇則令威鹵之師與延昭會使腹背受敵若不攻定州縱軼南侵則復會北平田敏合勢入契丹界邀其輜重令雄霸破鹵已來互爲聲援又命孫全照王德鈞裴自榮將兵八千屯寧邊軍李重貴趙守倫張繼旻將兵五千屯邢州扼東西路契丹將遁則令定州大軍與三路騎兵會擊之令普統軍一萬于莫州盧文壽王守俊監之敵騎北去則西趨順軍襲擊斷西山之路如河冰已合敵由東路則劉用劉漢凝田思明以兵五千會普全照爲犄角仍命石保吉將萬兵鎮大名以張軍勢繪圖以授諸將後數月敕輔臣曰北邊已屯大兵而邊奏至敵未有釁且聚軍虛費民力何以給之宜有制畫以爲控遏且靜戎順安軍界先開營田河道可以扼黑盧口三臺小李路亦可通漕運至邊宜乘此用衆浚治使及軍城彼或撓吾役卽合兵擊之李沆等曰設險以制敵守邊之利也遂詔內侍閻文慶與靜戎順安知軍事王能馬濟督其事而徙普屯順安之西與威鹵魏能保州楊延昭北平田敏爲犄角內侍馮仁俊掌御劍于莫州與普不叶帝曰勿窮治以驕將帥第召仁俊還又令普

率所部屯乾寧軍復遷葷冀州團練使徙本州總管 按王超傳咸平二年秋大閱禁兵二十萬於東郊超執五方旗以節進退上御戎幄觀之面賜褒獎從幸大名與都虞候張進並爲先鋒都大點檢傅潛逗撓得罪以超爲侍衛馬步軍都虞候鎮州行營都部署又帥鎮定高陽關三路契丹入邊與戰于遂城西俘馘二萬計斬其裨王騎將十五人手詔褒美 按范廷召傳咸平二年契丹入塞車駕北巡廷召與戰瀛州西斬首二萬級逐北至莫州東三十里又斬首萬餘奪其所掠老幼數萬口契丹遁去師還錄功加檢校太傅

咸平三年春正月王均據益州詔戶部使雷有終討誅之 按宋史眞宗本紀咸平三年春正月甲午益州軍變害鈐轄符昭壽逐知州牛冕等推都虞候王均爲首作亂詔戶部使雷有終爲廬州觀察使帥師會李惠等討之均閉城門固守二月丁卯益州王均開城僞遁雷有終等入城爲所敗退保漢州李惠死之冬十月甲辰雷有終大敗賊黨復益州殺三千餘人已丑雷有終追斬王均于富順監禽其黨六千餘人雷有終等以功進秩有差 按符昭壽傳咸平初昭壽遷鳳州團練使益州鈐轄昭壽以貴家子日事游宴簡倨自恣常紗帽素覽衣偃息後圃不理戎務有所裁決卽令家人

傳道多集錦工就麻舍織織麗綺帛每有所須取給于市餘半歲方給其直又令部曲私邀取之廣
糴黍稻未及成熟者亦取之悉貯寺觀中久之損敗卽勒道釋償之縱其下陵忽軍校劍南自李順
平後人心洶洶知州牛冕緩弛無政昭壽又不能御軍人皆怨憤神衛率趙延順等八人謀欲害昭
壽未敢發三年正旦中使自義眉山還京昭壽戒馭吏具鞍馬將送之延順等悉解廐中馬輶奔逸
庭下陽遂誼呼登廳執昭壽殺之并殺二僕據甲仗庫取兵器都監王澤聞之急召本軍都虞候王
均率兵擒捕延順左執昭壽首右操劍彷徨無所適卒見均至卽與衆推均爲帥合驍猛威武兵爲
亂牛冕洎轉運使張適奔漢州是秋官兵討平之 按高繼勳傳瓊子宇紹先咸平初王均據益州
以崇儀副使爲益州兵馬都監提舉西川諸州軍巡檢公事招安使雷有終以兵五百授繼勳守東
郭二門會賊攻彌牟砦繼勳引兵轉鬪至嘉州敗之獲黃繖金塗鎗以還有終益以勁兵復進攻二
門克之乃建幟城上諸將知城拔有終乃引軍薄天長門賊復來拒戰會日暮有終欲少休繼勳曰
賊窘矣急擊之無失也率十數騎鏖戰身被數創血濡甲馬死更馬以進會入內都知秦翰來援賊
退保子城不敢出繼勳潛知賊欲夜遁開圍使得潰去均卒敗滅以功遷崇義使賊餘黨保山藪中

時出剽刦乃徙綿漢劍門路都巡檢使繼勳募惡少年偵賊動靜窮蹙巖穴掩其不備悉擒殺之又徙陝路鈐轄 按雷有終傳咸平三年將巡師大名遣有終乘驛先詣澶州督納糧草車駕還次德清軍會益州奏至神衛戍卒以正旦竊發害兵馬鈐轄符昭壽擁都虞候王均爲亂逐知州牛冕卽日拜有終瀘州觀察使知益州兼川陝兩路招安捉賊事御廚使李惠洛苑使石普供備庫副使李守倫並爲招安巡檢使給步騎八千命往招討又以洛州團練使上官正爲東川都鈐轄西作坊使李繼昌爲陝路都鈐轄崇儀副使高繼勳王阮並爲益州駐泊都監供奉官閤門祇候孫正辭爲諸州都巡檢使正月三日均率衆陷漢州進攻綿州旬日不能下趣劍門先是知劍州祕書丞李士衡度寇必至城不能守悉徙官帑保劍門焚其倉廩及署榜招軍卒之流逸者得數千人已而賊果至士衡與劍門都監左藏庫副使裴臻逆擊之時風雪連日均衆無所掠惟食敗糟臻與戰斬首數千級賊衆疲劇宵遁還保益州士衡卽馳騎入奏上嘉之拜士衡度支員外郎賜緋臻崇儀使領峰州刺史仍舊職知蜀州供奉官閤門祇候楊懷忠聞變卽調鄉丁會十一路巡檢兵刻期進討蜀民不從賊者相率抗禦儕伍謂之清壇衆擇清壇之魁七十餘人悉補巡檢將遣判官高本馳驛以聞十

七日懷忠率衆入益州焚城北門至三井橋時均尙留劍門與賊將魯麻胡陣于江濱廟前自晨至
晡戰數合懷忠兵勢不敵退還所部懷忠部下多李順舊黨頗貪剽劫故敗績焉懷忠移文嘉眉七
州調軍士丁男來會二月再攻益州時均方遣逆黨趙延順攻邛蜀懷忠逆與之戰賊稍退懷忠與
轉運使陳緯麾兵由子城南門直入軍資庫與緯署其庫籩均衆皆銀槍繡衣爲數隊分列子城中
賊兵出通遠門與懷忠戰數合會暮懷忠復退軍作橋背水列陣砦櫓木橋南以扞邛蜀之路賊故
不復能南略自清水壩溫江金馬三道來攻櫓木砦出官軍後焚江原神祠斷邛蜀援路懷忠三路
分兵以抗之斬首五百餘級驅其餘衆入阜江獲甲弩甚衆乘勝逐賊至益州南十五里砦于雞鳴
原以俟王師均亦閉成都東門以自固是月有終等至令石普先與綿漢都巡檢張思鈞收復漢州
進壁升僊橋賊出攻砦有終擊走之一日均開城僞爲遁狀有終與上官正石普率兵徑入官軍分
剽民財部伍不肅賊閉關發伏布牀榻于路口官軍不得出因爲所殺有終等緣堞而墜李惠死之
退保漢州益州城中民皆奔迸四出復爲賊黨分騎追殺或囚繫之支解族誅以恐衆又脇士民僧
道之少壯者爲兵先刺手背次髡首次黥面給軍裝令乘城與舊賊黨相間有終署榜招之至則署

其衣袂釋之日數百人三月進攻彌牟砦斬首千餘級復爲賊所拒四月賊由升僊橋分路來寇併軍于東偏有終率兵逆擊大敗之殺千餘人奪其繳蓋金槍等物均單騎還城有終遣其子奉禮郎孝若馳奏上召孝若問敗賊之由笑謂左右曰均鼠竊爾雖嬰城自守計日可擒矣孝若因言嘗習武藝願改秩以効卽補供奉官俄以刑部員外郎馬亮爲轉運使國子博士張闕言副之供備庫副使張昫爲綿漢都巡檢使楊懷忠又分所部砦于合水尾浣花等處樹機石設笇籬以拒之賊自升僊之敗徹橋塞門官軍進至清遠江爲梁而度有終與石普屯于城北門之西依壕爲土山分設鹿角又得舊草場造梯衝洞車攻具普專主之高繼勳張昫孫正辭攻城東上官正李繼昌王阮攻城西楊懷忠與巡檢殿直閤門祇候馬貴攻城南賊將趙延順盡驅兇黨以拒旣而延順中流矢死又遣其黨丁重萬立城門上官軍射之殪每攻城輒會雨城滑不能上官軍及丁夫爲洞屋以進賊又鑿地道出掩之溺壕中死者千餘軍勢小衄時方暑濕軍士多疾有終市藥他州療之是月詔洛苑使入內副都知秦翰爲兩川捉賊招安使有終與翰叶議於城北魚橋又築土山八月克城北羊馬城遂設鴈翅敵柵覆洞屋以進逼羅城九月城北洞屋成賊對設敵樓以抗官軍有終遣卒焚之賊

自是銷沮築月城以自固有終募敢死士間道以入賊爲藥矢中者立死有終令卒蒙氈秉燧以入
悉焚其望櫓機石先遣東西南若鼓譟攻城有終與石普分主洞屋以進普穴城爲暗門門成賊攢
戟於前無敢進者有二卒請行許以厚賞乃麾戈直衝之賊鋒稍却遂入城有終登城樓下瞰賊之
餘衆衝若天長觀前於文翁坊密設礮架高繼勳曰于馬亮請給穞秆油粃衆執長戟巨斧秉炬以
進悉焚之楊懷忠焚其砦天長觀前追至大安門復敗焉是夕二鼓均與其黨二萬餘南出萬里橋
門突圍而遁有終疑有伏遣人縱火城中詰朝與秦翰登門樓牙吏有書僞署官職者捕得立樓下
傍積薪厝火其上索男子魁壯者令辨之曰某嘗受某職卽命左右擠投火中自晨至晡焚死者數
百人時謂冤酷均旣走度合水尾由廣都略陵榮趣富順監所過斷橋塞路焚倉庫而去初有終遣
懷忠領虎翼軍追之後二日石普繼往以全軍爲後援十月均至富順其將校以筏渡江趨戎瀘蠻
境朝廷每歲孟冬朔詔富順監具酒肴犒內屬蠻酋是日裁設具而均黨適至皆食焉聞懷忠追騎
將至均心易之謂其黨曰速降懷忠令其衆負擔以行懷忠距富順六十里於楊家市少憩賊衆在
後者邀戰懷忠遣騎士歷高原覘賊且語其左右曰縱賊度江後悔無及聞石侯將至當以奇兵取

之乃臨江列陣擊之餘黨散走有拏舟將度江而遁者懷忠合強弩射之溺死甚衆懷忠張旗鳴鑼入城均方在監署中其衆多醉均窮感縊死虎翼軍校魯斌斬其首詣懷忠獲僭僞法物旌旗甲馬甚衆擒其黨六千餘人逆徒殲焉懷忠旋軍出北門石碁之衆方至奪均首馳歸成都梟于北市均本隸開封散從直後補軍校初神御軍之戍成都者以均及董福分二指揮以領之福御衆有法部下皆優足均縱其下飲博軍裝亦以給費是歲車駕幸河朔符昭壽與牛冕大閱于東郊蜀人趨視之二軍衣服鮮弊不等均衆因是慙憤益州知州與鈴轄二廨並禁旅爲牙隊歲除冕以酒肴犒部士而昭壽旣驕恣復肆侵虐冕亦寬弛無政故諸朝合起爲亂神衛卒旣殺昭壽是日成都官吏方相與賀正聞變皆奔竄牛冕與轉運張適縋城而出惟都巡檢使劉紹榮冒刃格鬪旣而衆寡不敵叛卒尙未有主或欲奉紹榮爲帥者紹榮攝弓罵曰我燕人也比棄鄉土來歸本朝豈能與汝同逆汝亟殺我我肯負朝廷哉衆未敢動監軍王澤與均適至乃謂均曰汝所部爲亂盍自往招安均旣往叛卒卽擁之爲王紹榮自到死均僭號大蜀改元化順署置官稱設貢舉以張錯爲謀主錯本名美太原舊卒後爲神衛小校狡獪嘗歷戰陣粗習陰陽以熒惑同惡故勸均爲亂均實慙悞無謀嘗